

## ■ CONVIVENZA

# Il cumbat da las conscienzas

DA VIOLA CADRUVI\*

**D**acurt hai jau tutteni-na senti il ferm impuls da cumprar in iPad. Ma avant ch'jau hai pudì cumenzar a tschertgar l'object desiderà en l'online-shop s'annunzia gia mia conscienza finanziaria: «Na, Viola! Quai custa bler me-mia bler. Products dad Apple èn chareschia», di ella. «Ma iPads èn simpla-main ils megliers tablets. Ed jau stoss cumprar in iPad perquai ch'el sto esser cumpatibel cun mes iPhone e mes MacBook.» «Sche ti has gia in iPhone ed in MacBook, pertge dovras lura in iPad?», dumonda la conscienza finanziaria. «Oh, tge duvrar! Nagin na dovra in iPad, cunzunt betg sch'ins ha schon in MacBook. Quai è mo in termagl tecnic», s'annunzia gist anc mes saun giudizi. Jau stoss natiral-main laschar valair quest argument. Ma uschè spert na capitulesch jau betg: «Ma igl è uschè practic, gist per leger la gasetta u leger cudeschs digital. Quai è era pli ecologic. Nagin pal-piri na vegn sfarlattà.»

**J**au less gia triumfar cura ch'ina outra vusch maligna sa far udir: «Viola, Viola, Viola. Ti sas bain tge emissius che la producziun d'in tal iPad chaschuna?» Mia conscienza ecologica è cumparida sin il palc. Conscienza finanziaria e



saun giudizi applaudeschan en las ultimas retschas. Jau fatsch anc in'emprova: «Ma pensa al palpìri ch'jau pudess spargnar sch'jau fasschess davent dad ussa tut mias notizias sin l'iPad.»

**T**ias notizias poss bain era far sin tes laptop», sbragia la conscienza finanziaria. «Lura poss almain era leger ellas.» – «Ma... Ils novs iPads traglischan uschè bel. Ed i dat els en rosa ed aur...», emprov jau gia decuraschada cura che s'avischina ina tarmenta sumbriva stgira. Ils emprims tacts da la 5avla sinfonia da Beethoven resunan e tschellas conscienzas sa zuppan davos il saun giudizi cura ch'ina fin lura dal tutfatg nunenconuschenta conscienza cumpara: la matrona da las conscienzas, la nauscha conscienza maternalna.

**C**un vusch starmentusa di ella: «VIOLA! Ti daventas mamma! Vuls ti propi daventar ina da quella che guarda mo sin ses

apparat enstagl sin ses uffant? Ti has lura da t'occupar da tes pop e betg da smatgar e stritgar enturn sin ina tala maschinal!» La conscienza finanziaria guarda en direcziun dal saun giudizi. Lez gughegia d'aggiunscher: «Gea, e patratg tge ch'in uffant custa. Pudessas bain dar ora meglier tes daners.» – «U gist spargnar els», marmugna la conscienza finanziaria davostiers.

**L**a conscienza maternalna metta ils mauns a chalu-n e dat dal chau. «Vesas, Viola!» Jau perd il curaschi e capitulesch. Intgins displi tard hai jau dentant in pachet en la posta: lien in nov iPad – in dad aur. En in mument malattent han duas ulteriuras instanzas internas surpiglià il scepter. Mes egoissem è s'allià cun l'autoprotecziun e m'ha scutinà en l'ureglia: «Sas Viola, quest pop dorma se-gir savens al cumenzament. Sin l'iPad poss lura leger in cudesch u guardar in film u lavurar vi da tia dissertaziun. E per cas ch'i dat in sbragialer tant meglier, lura has ina distracziun cura che tes ami guarda dal pop e questa stoda matrona, la conscienza maternalna, ta vul intimar da ta maschardar en...»

\* Viola Cadruvi ha studegià germanistica, istorgia e rumantsch a l'Università da Turitg. Mintgant lavura ella vi da sia dissertaziun e mintgant sco scolasta, ma bunamain adina scriva ella.